

Ўзбекистон Республикаси
Давлат статистика қўмитасининг
2017 йил “25” декабрдаги 5 - сон қарорига
ИЛОВА

**Дехқон (шахсий ёрдамчи) хўжаликлари танланма
кузатувини ташкил этиш ва ўтказиш бўйича
услубий низом**

Мазкур услубий низом деҳқон (шахсий ёрдамчи) хўжаликлари (юримдик шахс ташкил этган ва юримдик шахс ташкил этмаган), уларнинг қишлоқ хўжалиги фаолияти статистик кузатувини ташкил этиш учун танлов жамланмасини шакллантириш тартибини, танланма маълумотларни мақсадли жамланмага тарқатиш ҳамда кузатув натижаларини Ўзбекистон Республикасини ижтимоий-иқтисодий ривожлантиришнинг қишлоқ хўжалиги соҳаси бўйича тегишли йилнинг I ва III чорак яқунлари учун ҳисоб-китобларида қўллаш механизмини ўз ичига олган комплекс ҳужжат ҳисобланади.

Услубий низом ер майдонлари ўлчамлари, чорва моллари ва паррандалар бош сони, натура кўринишида деҳқончилик ва чорвачилик маҳсулотларини етиштириш ҳажмлари, деҳқон (шахсий ёрдамчи) хўжаликлари қишлоқ хўжалиги фаолияти тўғрисидаги ахборотларни шакллантириш учун тезкор маълумотларни йиғиш механизмини белгилайди.

Кузатувларни ўтказиш механизми танланма кузатувлар (кейинги ўринларда кузатув деб аталади)ни ташкил этиш ва ўтказиш босқичларига мос келувчи кетма-кетликда ифодаланган ва давлат статистика органлари томонидан тегишли ҳисобот даврида деҳқончилик ва чорвачилик маҳсулотларини етиштириш бўйича ҳисоб-китобларни амалга ошириш имконини берувчи ҳаққоний статистик маълумотларни олиш учун мўлжалланган.

Мазкур услубий низомни ишлаб чиқишда, Ўзбекистон Республикасининг ердан фойдаланиш ва қишлоқ хўжалиги соҳасидаги норматив-ҳуқуқий ҳужжатларидан, шунингдек БМТнинг Озиқ-овқат ва қишлоқ хўжалиги ташкилоти (ФАО) тавсияларидан ва МДХ давлатларининг тажрибаларидан фойдаланилган.

Кузатувларни ўтказиш учун Ўзбекистон Республикасининг “Давлат статистикаси тўғрисида”ги Қонунининг 6 ва 11 - моддалари, Ўзбекистон Республикаси Вазирлар Маҳкамаси томонидан ҳар йили тасдиқланадиган Давлат статистика ишлари дастури қонуний асос бўлиб ҳисобланади.

I. Умумий қоидалар

1. Кузатувларни ташкил этиш ва ўтказиш республика ҳамда ҳудудлар миқёсида амалга оширилади.

2. Кузатув йилда 2 марта, март ва сентябрь ойларида республиканинг барча ҳудудларида Давлат статистика ишлари дастурига ва Давлат статистика ишларини ишлаб чиқариш дастурига асосан ўтказилади.

3. Кузатув 1-DХК “Юридик шахс ташкил этган деҳқон хўжалиги фаолиятини танлама кузатув сўровномаси” ва 2-DХК “Юридик шахс ташкил этмаган деҳқон хўжалиги фаолиятини танлама кузатув сўровномаси” шаклларида фойдаланган ҳолда хўжаликлар бошлиқлари ёки аъзоларидан бевосита сўраш (интервью олиш)га асосланади ва танлаб олинган хўжаликларнинг унда ихтиёрий қатнашиши асосида амалга оширилади.

4. Сўровномаларни тўлдириш, кузатув даврида бевосита давлат статистика органлари мутахассислари томонидан амалга оширилади.

II. Танлов жамланмасини шакллантириш

5. Кузатув бирлиги бўлиб, юридик шахс ташкил этган деҳқон хўжаликлари ва юридик шахс ташкил этмаган деҳқон хўжаликлари ҳисобланади.

Зарур ҳаққоний даражада танловни шакллантириш мақсадида танловнинг асоси сифатида (мақсадли жамланма) юридик шахс ташкил этган деҳқон хўжаликлари ва юридик шахс ташкил этмаган деҳқон хўжаликларининг сонидан фойдаланилади.

Юридик шахс ташкил этмаган деҳқон хўжаликлари танлов жамланмасини шакллантиришда мақсадли жамланмага фақат фойдаланишида ер майдонларига эга бўлган хўжаликлар қўшилади.

6. Танлов жамланмасини шакллантириш Давлат статистика қўмитаси томонидан амалга оширилади ва ҳудудий статистика органларига етказилади.

7. Юридик шахс ташкил этган деҳқон хўжаликлари танлов жамланмасини шакллантириш:

Биринчи босқичда, корхоналар ва ташкилотларнинг ягона давлат регистри маълумотлари асосида, ҳар бир туман (шаҳар) кесимида юридик шахс ташкил этган деҳқон хўжаликларининг 1 январь ҳолатига бўлган рўйхати (мақсадли жамланма) шакллантирилади.

Иккинчи босқичда, юридик шахс ташкил этган деҳқон хўжаликлари танлов жамланмасини шакллантириш оддий тасодифий танлаш усули билан туман (шаҳар)лар кесимида амалга оширилади.

8. Йиллик танлов жамланмаси, ҳар бир ҳудуд бўйича мақсадли жамланмага қўшилган хўжаликларнинг 20,0 фоизини (март ва сентябрь ойларида 10,0 фоиздан) қамраб олади.

9. Юридик шахс ташкил этмаган деҳқон хўжаликлари танлов жамланмасини шакллантириш:

Биринчи босқичда, маҳалла фуқаролар йиғинларини танлашда 1 январь ҳолатига бўлган 1-DX shakli «Деҳқон (шахсий ёрдамчи) хўжаликлари фаолияти тўғрисида ҳисобот» давлат статистика ҳисоботи шакли маълумотларидан фойдаланилади.

Иккинчи босқичда, ҳар бир туман (шаҳар) бўйича биринчи босқичда рўйхатга киритилган маҳалла фуқаролар йиғинлари кесимида хўжаликлар сони аниқланади.

Хўжаликлар сонини аниқлашда 1 январь ҳолатига бўлган 1-DX shakli «Деҳқон (шахсий ёрдамчи) хўжаликлари фаолияти тўғрисида ҳисобот» давлат статистика ҳисоботи шакли маълумотларидан фойдаланилади.

Учинчи босқичда, танлама кузатувни ўтказиш учун маҳалла фуқаролар йиғинлари биринчи босқичда рўйхатга тушганлари бўйича танланади.

Тўртинчи босқичда, танлама кузатувни ўтказиш учун учинчи босқичда рўйхатга тушган фуқаролар йиғинлари бўйича хўжаликлар сони (танлов жамланмаси) аниқланади.

10. Йиллик танлов жамланмаси, ҳар бир ҳудуд (туман (шаҳар) ва маҳалла фуқаролар йиғини) бўйича иккинчи босқичда мақсадли жамланмага киритилган хўжаликларнинг 0,5 фоизини (март ва сентябрь ойларида 0,25 фоиздан) қамраб олади.

11. Танловга қўшилган ҳар бир юридик шахс ташкил этган деҳқон хўжалиги, маҳалла фуқаролар йиғини, деҳқон (шахсий ёрдамчи) хўжалиги йилда фақат бир марта кузатилади яъни, ёки март ёки сентябрь ойида сўров ўтказилади.

12. Кузатув қуйидаги кетма-кетликда ўтказилади:

1-босқич. Тайёргарлик ишлари.

2-босқич. Сўров ўтказиш.

3-босқич. Маълумотларни қайта ишлаш.

III. Тайёргарлик ишлари

13. Давлат статистика қўмитаси томонидан давлат статистика ишлари дастури ва давлат статистика ишлари ишлаб чиқариш дастурида белгиланган муддатларда тайёргарлик тадбирларини ва кузатув мониторингини ўтказиш Қорақалпоғистон Республикаси, вилоятлар ва Тошкент шаҳри статистика бошқармалари томонидан таъминланади.

Тайёргарлик ишлари қуйидагиларни ўз ичига олади:

а) супервайзерларни тайинлаш - Қорақалпоғистон Республикаси, вилоятлар ва Тошкент шаҳри даражасида;

б) туман (шаҳар) статистика органлари ходимлари ичидан танлаб олинган интервьюерларни қуйидаги йўналишлар бўйича ўқитиш ва инструктаж бериш:

кузатув мақсади ва вазифаларини тушунтириш;

юридик шахс ташкил этган деҳқон хўжалиklarини, маҳалла фуқаролар йиғинларини ва деҳқон (шахсий ёрдамчи) хўжалиklarини танлаш тартиби билан таништириш;

юридик шахс ташкил этган деҳқон хўжалиklари ва юридик шахс ташкил этмаган деҳқон хўжалиklarининг қишлоқ хўжалиги фаолияти кузатувини ўтказиш иш тартибини, кузатув дастури ва маълумотларни йиғиш тартибини ўрганиш.

в) кузатиладиган хўжалиklar бўйича маълумотлар йиғишни режалаштириш.

14. Маълумотлар йиғишни режалаштириш (ташрифни режалаштириш), интервьюерлар томонидан тегишли юридик шахс ташкил этган деҳқон хўжалиги, маҳалла фуқаролар йиғини ва деҳқон (шахсий ёрдамчи) хўжалиги билан келишув бўйича амалга оширилади, бунда юридик шахс ташкил этган деҳқон хўжалиги, маҳалла фуқаролар йиғини ва деҳқон (шахсий ёрдамчи) хўжалиги бошлиғи мазкур кузатувнинг мақсади, вазифалари ва мазкур юридик шахс ташкил этган деҳқон хўжалиги, фуқаролар йиғини ва деҳқон (шахсий ёрдамчи) хўжалиги кузатув танлови режасига тушганлиги тўғрисида хабардор қилинади ва унга асосан Ташриф режаси тайёрланади.

Ҳар бир ташриф даври учун Ташриф режаси супервайзер билан келишилади ва туман (шаҳар) статистика бўлими бошлиғи томонидан тасдиқланади.

IV. Сўров ўтказиш

15. Сўров туман (шаҳар)даги юридик шахс ташкил этган деҳқон хўжалиklари, маҳалла фуқаролар йиғинлари ва деҳқон (шахсий ёрдамчи) хўжалиklarининг белгиланган сони бўйича ўтказилади.

Интервьюер хўжаликка борганда, саволларга жавоб олиш учун респондентни (у хўжалик бошлиғи ёки улар сабабли равишда жойида бўлмаганларида хўжаликни яхши биладиган аъзоси бўлиши мумкин) аниқлаб олади.

Респондентнинг кузатувда иштирок этишга розилигини олганидан сўнг, интервьюер сўров ўтказишга киришади.

Сўров ўтказаетган интервьюер, 1-DXK “Юридик шахс ташкил этган деҳқон хўжалиги фаолиятини танлама кузатув сўровномаси” ва 2-DXK “Юридик шахс ташкил этмаган деҳқон хўжалиги фаолиятини танлама кузатув сўровномаси” шаклини кузатилаётган хўжаликнинг ўзида туриб тўлдириши ва текшириши зарур. Хўжаликнинг розилигисиз ёзувларга ҳар қандай тузатиш ва ўзгартириш киритиш таъқиқланади.

Респондент сўровда иштирок этишни рад этган ҳолларда танловга тушган хўжаликни алмаштириш мумкин, чунки олинган маълумотларнинг тўғрилиги ва ишончилиги сўровнома саволларига берилган жавобларнинг самимийлиги ҳамда аниқлилик даражасига боғлиқ. Хўжалик алмаштирилаётганда, имкон қадар алмаштирилаётган хўжаликка ўхшаш катталиқдаги ёки унга деярли яқин бўлган хўжалик танланади.

16. Сўровнома кўрсаткичларини тўлдиришда, унга киритилган барча кўрсаткичларнинг рақамли белгиларини тўла ҳажмда тўғри тўлдирилишига аҳамият бериш керак.

17. **“Қишлоқ хўжалиги экинларининг, мевалар, резаворлар ва узумнинг йиғиб олинган ялпи ҳосили”** кўрсаткичларини тўлдиришда, уларнинг сақлаш учун жойлаштирилганлигидан, озиқ-овқат ёки чорва молларини озиқлантириш учун фойдаланилганлигидан ёки сотилганлигидан қатъий назар, экин ерлари ва боғларнинг барча маҳсулотларини ҳисобга олиш зарур бўлади.

Қишлоқ хўжалиги экинларининг, мевалар, резаворлар ва узумнинг йиғиб олинган ялпи ҳосили дастлабки қирим қилинган (физик) вазнда ҳисобга олинади.

18. Кузатиладиган алоҳида экинлар бўйича қуйидагиларни эътиборга олиш зарур:

сабзавотлар бўйича - ёппасига йиғимгача ва ёппасига йиғимдан кейинги қисман йиғимни қўшган ҳолда, очиқ ва ёпиқ ерлардан йиғилгани кўрсатилади;

консервалаш, янги ҳолида озиқ-овқат учун фойдаланилган сут ва сут-мум пишишдаги қанд маккажўхори сўталари ҳам сабзавотлар гуруҳида кўрсатилади;

сабзавот-полиэ экинлари ва пиёз уруғзорлари, сабзавотларнинг ялпи ҳосилига киритилмайди, лекин бир йиллик сабзавотлар қисман (танлаб) уруғлик учун фойдаланилганда, уларнинг ҳосили тўлиғича сабзавотлар гуруҳида кўрсатилади;

маккажўхори хўжаликда фойдаланиш тури бўйича, яъни дон учун ишлаб чиқарилгани – дон экинлари ҳисобида (тўлиқ пишиш давридаги сўталарнинг қуруқ донга қайта ҳисобланган вазни), силос, кўк озуқа (сўталари ва пояси) учун ишлаб чиқарилгани – озуқа экинлари ҳисобида кўрсатилади;

силос, кўк озуқа ва сенаж учун маккажўхори ва бошқа экинлар кўк масса вазнида кўрсатилади;

бир йиллик ўтлар ва ўтган йилларда, ўтган йилнинг кузида ва жорий йилда экилган кўп йиллик ўтлар пичанга айлантирилиб кўрсатилади.

19. **Ёпиқ ерлар** майдонларига иссиқхоналар, парниклар, иситиладиган ерлар ва плёнка остидаги экинлар қиради.

Иссиқхоналар қишки ва баҳорги бўлиши мумкин. Қишки иссиқхоналарга, йил давомида фойдаланиладиган, ойна билан қопланган ва бошқа иситиладиган иссиқхоналар ҳамда қишки ва эрта баҳорги даврларда маҳсулот чиқишини таъминловчи плёнка остидаги иситиладиган иссиқхоналар қиради. Баҳорги иссиқхоналар табиий йўл билан иситилади.

Парниклар кичик ҳажмли бўлиб, ўсимликларни ташқи муҳит таъсиридан сақлашга мўлжалланган бўлади ва табиий йўл билан иситилади. Парниклар тўлиқ плёнка остида ёки ён томонлари девор билан ўралган ҳамда ерни 0,5-2 метргача қовлаб усти плёнка билан ёпилган бўлиши мумкин.

Иситиладиган ерлар ва плёнка остидаги экинларга, алоҳида майдонларда ёки дала алмашлаб экилишида плёнка (енгил ёки мустаҳкам) билан ёпилган ерлар киради.

Жорий йил ҳосили учун экилган ёпиқ ерлар умумий майдонини аниқлашда, биринчи ҳосил учун экин экишлар (кўчат ўтқазилар) амалга оширилиб, ҳақиқатда фойдаланилган майдон (барча турлардаги иссиқхоналар, парниклар, иситиладиган ерлар ва плёнка остидаги экинлар) ҳисобга олинади. Ёпиқ ерларда иккинчи ва ундан кейинги ҳосил учун экин экилган (кўчат ўтқазилган) майдон эътиборга олинмайди.

Ёпиқ ерлардаги қишлоқ хўжалиги экинларининг ялпи ҳосили алоҳида ҳисобга олинади, шунингдек тегишли экинларнинг умумий ялпи ҳосилига киритилади.

20. “Чорва моллари ва паррандалар бош сони” кўрсаткичини тўлдириш физик бирликда (бошда, асалари оилалари – донада) бутун сонда амалга оширилади.

Хўжаликдаги мавжуд барча қишлоқ хўжалиги ҳайвонлари ва паррандалар, уларнинг яйловда ёки хўжаликдан ташқари бошқа жойларда бўлишидан қатъий назар, ҳисобга олиниши зарур.

Ўғирланган ёки нобуд бўлган қишлоқ хўжалиги ҳайвонлари ва паррандалар мавжуд бош сонга киритилмайди. Бошқа хўжаликлардан уларнинг топшириғига асосан сотиш учун қабул қилинган моллар ва паррандалар ҳам ҳисобга олинмайди.

Сигирлар сонига, асосий подадаги сут ва гўшт йўналишидаги, сутдан чиққан, қисир, озиклантирувчи сигирларнинг барчаси киритилиши зарур. Сигирлар сонига бўрдоқиллаш ёки яйловда боқиш (семиртириш) учун ўтказилган сигирлар қўшилмайди.

21. “Ишлаб чиқарилган гўшт, тирик вазнда” кўрсаткичини тўлдиришда, ҳам сўйиш учун сотилган, ҳам ўз хўжалигида сўйилган барча қишлоқ хўжалиги ҳайвонлари ва паррандаларнинг тирик вазни ҳисобга олинади. Келгусида такрор ишлаб чиқариш учун сотилган ёш моллар, сўйиш учун сотиш ҳажмига киритилмайди.

22. Сут ишлаб чиқариш, ёш молларга ичириш учун соғиб олинган сут ва оғиз сутини қўшган ҳолда, ҳақиқатда соғиб олинган сигир, эчки, қўй, бия ва туя сутлари билан аниқланади, бузоқлар эмган сут ялпи ишлаб чиқаришга киритилмайди.

23. Тухум ишлаб чиқариш, барча турдаги паррандалардан олинган (синган, бузилган ва шунга ўхшашларни қўшган ҳолда) ҳамда курк товуклар билан ва инкубаторда жўжа очиш учун сарфланган тухумларни ўз ичига олади.

24. Жун ишлаб чиқариш, хўжаликнинг ички эҳтиёжларига сарфлангани ҳамда жунни сақлаш ва ташиш жараёнида йўқотилганини қўшган ҳолда, қўй, эчки, туялардан ҳақиқатда қирқиб олинган натура вазндаги (қирқиб олингандан кейинги вазнда) барча жунларни ўз ичига олади, бунга туллаш жунни, эчки тивити ҳамда такрорий қирқиб олинган жунлар ҳам қўшилади.

25. Қоракўл тери ишлаб чиқариш, уч кунлигида сўйилган қоракўл зотли кўзиларнинг териларини ўз ичига олади, бунда асосий маҳсулот қоракўл тери ҳисобланади, олинган гўшт эса сўйиш учун сотиш ҳажмига қўшилмайди.

26. **Асал ишлаб чиқариш**, асаларилар томонидан йиғилган, ҳам уялардан чиқариб олинган, ҳам асалариларга қишки-бахорги даврларда озуқа учун қолдирилган асал миқдорини ўз ичига олади.

27. **Балиқчилик маҳсулот**и табиий ва сунъий сув ҳавзаларидан овланган балиқ маҳсулотлари миқдори билан аниқланади.

V. Маълумотларни қайта ишлаш

28. Кузатув натижасида олинган ахборотлар, стандарт дастурий воситаларни қўллаш орқали қайта ишланади.

29. Интервьюер, сўров яқунланиши билан сўровнома маълумотларини дастурий таъминотга киритади, арифметик ва мантикий хатолар йўқлигини текширади.

30. Маълумотларни киритиш ва киритилган маълумотларни текшириш яқунлангандан сўнг, умумлаштирилган маълумотлар электрон шаклда ҳудудий супервайзерларга юборилади.

Ҳудудий супервайзерлар, интервьюерлардан олинган сўровнома маълумотларини текширгандан кейин, ҳудуд даражасида туманлар ва шаҳарлар кесимида умумлаштирилган натижаларни шакллантирадилар.

VI. Танланма маълумотларни мақсадли жамланмага тарқатиш

31. Хўжаликлар кузатуви натижасида олинган танланма маълумотларни мақсадли жамланмага тарқатиш, туман (шаҳар) даражасида, автоматлаштирилган тарзда Давлат статистика қўмитаси томонидан ишлаб чиқилган махсус дастурий таъминотдан фойдаланган ҳолда амалга оширилади (1- ва 2-илова).

Кузатув маълумотларини мақсадли жамланмага тарқатиш учун “**Ўртача бўйича тарқатиш (Z)**” усулидан фойдаланилади.

32. Ҳисоб-китоб сўровномага киритилган ҳар бир кўрсаткич бўйича, тегишли туман (шаҳар) танлов жамланмасининг йиғинди кўрсаткичи билан амалга оширилади (ҳисоб-китоб намунаси 1-ва 2-иловаларда кўрсатилган).

Масалан, “Дон ва дуккакли дон экинларининг йиғилган ялпи ҳосили” (x_1), “Картошканинг йиғилган ялпи ҳосили” (x_2) ва ҳ.к.ларнинг 1 та хўжаликка тўғри келадиган ўртача кўрсаткичи қуйидаги формула орқали ҳисобланади:

$$Z = \sum x_1 : n,$$

бу ерда: $\sum x_1$ – биринчи кўрсаткичнинг туман (шаҳар) бўйича йиғинди кўрсаткичи;

n – туман (шаҳар) бўйича танлов жамланмасидаги хўжаликлар сони.

Танлов жамланмаси бўйича ҳисобланган дон ва дуккакли дон экинларининг йиғилган ялпи ҳосилининг 1 та хўжаликка тўғри келадиган ўртача кўрсаткичи мақсадли жамланманинг тегишли кўрсаткичларига тарқатилади.

Кузатув маълумотларини мақсадли жамланмага (G) тарқатиш, танлов жамланмасидаги 1 та хўжаликка тўғри келадиган ўртача кўрсаткични (Z) мақсадли жамланмадаги хўжаликлар сонига (N) кўпайтириш йўли билан амалга оширилади:

$$G = Z \times N$$

VII. Маълумотларни таққослаш

33. Дехқон (шахсий ёрдамчи) хўжалиklarининг қишлоқ хўжалиги фаолияти кузатувлари натижалари, Ўзбекистон Республикасини ижтимоий-иқтисодий ривожлантиришнинг қишлоқ хўжалиги соҳаси бўйича чораклик ва йиллик яқунларини амалга оширишда яъни умумлаштирилган кўринишда дехқон (шахсий ёрдамчи) хўжаликларини тоифасида ҳисобга олинади.

34. Қишлоқ хўжалиги соҳаси бўйича чораклик ва йиллик яқунларда фойдаланиладиган кузатув маълумотларининг ҳаққонийлигини таъминлаш учун, кузатув натижалари қуйидагича таққосланади:

1-DX shakli, йилда 2 марта (1 июль ва 1 январь ҳолатига) «Дехқон (шахсий ёрдамчи) хўжаликларини фаолияти тўғрисида ҳисобот» йиллик ва ярим йиллик давлат статистика ҳисоботлари маълумотлари билан;

тегишли туман (шаҳар)даги дехқон (шахсий ёрдамчи) хўжалиklarининг ўтган даврлар учун йиғма маълумотлари билан;

туман (шаҳар) бўйича кузатувга киритилган ҳар бир кўрсаткичнинг камида ўтган

3 йиллик динамикаси билан;

Ер ресурслари, геодезия, картография ва давлат кадастри давлат қўмитасининг ҳудудий бўлинмалари маълумотлари билан таққосланади.

VIII. Яқуний қондалар

35. Ушбу услубий низом бузилишида айбдор бўлган давлат статистика ходимлари белгиланган тартибда жавобгар бўлади.

Дехқон (шахсий ёрдамчи) хўжаликлари
танланма кузатувини ташкил этиш
ва ўтказиш бўйича услубий низомга
1-ИЛОВА

**Юридик шахс ташкил этган дехқон хўжаликлари кузатуви натижасида
олинган танланма маълумотларни тарқатиш бўйича
ҳисоб-китоб намунаси**

Намуна шартли

Т.р.	(х), сўровномадаги кўрсаткичлар рўйхати	(N), мақсадли жамланмадаги (G) хўжаликлар сони	(n), танлов жамланмасидаги хўжаликлар сони (G дан 10,0%)	(Σx1), танлов жамланмасидаги кўрсаткичларнинг йиғинди кўрсаткичи	(Z), 1 та хўжаликка тўғри келадиган ўртача кўрсаткич (Z = Σx1 : n)	G = Z x N, мақсадли жамланмадаги кўрсаткичларнинг йиғинди кўрсаткичи
1	Дон ва дуккакли дон экинлари, жами, соток	50	5	20	4	200
2	Дон ва дуккакли дон экинлари, жами, кг	50	5	500	100	5 000
3	Мевалар ва резаворлар-жами, соток	50	5	20	4	200
4	Мевалар ва резаворлар-жами, кг	50	5	3 000	600	30 000
5	Токзорлар, соток	50	5	20	4	200
6	Узум, кг	50	5	3 600	720	36 000
7	Йирик шохли қорамоллар-жами, бош	50	5	100	20	1 000
8	Асалари оилалари, дона	50	5	10	2	100
9	Сўйиш учун етиштирилган моллар ва паррандалар, тирик вазнда, центнер	50	5	10	2	100
10	Олинган тухум-жами, дона	50	5	25 00	500	25 000

Дехқон (шахсий ёрдамчи) хўжаликлари
танланма кузатувини ташкил этиш
ва ўтказиш бўйича услубий низомга
2-ИЛОВА

**Юридик шахс ташкил этмаган деҳқон хўжаликлари кузатуви натижасида
олинган танланма маълумотларни тарқатиш бўйича
ҳисоб-китоб намунаси**

Намуна шартли

Т.р.	(х), сўровномадаги кўрсаткичлар рўйхати	(N), мақсадли жамланмадаги (G) хўжаликлар сони	(n), танлов жамланмасидаги хўжаликлар сони (G дан 0,25%)	(Σx1), танлов жамланмасидаги кўрсаткичларнинг йиғинди кўрсаткичи	(Z), 1 та хўжаликка тўғри келадиган ўртача кўрсаткич (Z = Σx1 : n)	G = Z x N, мақсадли жамланмадаги кўрсаткичларнинг йиғинди кўрсаткичи
1	Дон ва дуккакли дон экинлари, жами, соток	4 000	10	20	2	8 000
2	Дон ва дуккакли дон экинлари, жами, кг	4 000	10	500	50	200 000
3	Мевалар ва резаворлар-жами, соток	4 000	10	20	2	8 000
4	Мевалар ва резаворлар-жами, кг	4 000	10	3 000	300	1 200 000
5	Токзорлар, соток	4 000	10	20	2	8 000
6	Узум, кг	4 000	10	3 600	360	1 440 000
7	Йирик шохли қорамоллар-жами, бош	4 000	10	100	10	40 000
8	Асалари оилалари, дона	4 000	10	20	2	8 000
9	Сўйиш учун етиштирилган моллар ва паррандалар, тирик вазнда, центнер	4 000	10	10	1	4 000
10	Олинган тухум-жами, дона	4 000	10	5 000	500	2 000 000